

草木典第四十九卷

芝部藝文一

易林

漢焦贛

文山紫芝雍梁朱草長生和氣王以爲寶

神芝贊

魏繆襲

青龍元年神芝產於長平之習陽其色丹紫其質光耀其長尺有八寸五分其本圍三寸有三分上別爲三榦分爲九枝散爲二十六莖圍則一寸九分葉徑二寸七分其榦洪纖連屬有似珊瑚之形其吐柯載葉祥明蠲潔考圖案牒蓋美乎所聞於前代者矣

皇太子賀芝草表

高宗

唐崔融

臣某言伏承某月日芝草生於乾元殿瑞命天來符祥日至煌煌三秀分雙

一作漢

井而攢柯煜煜九

光間梅梁而吐葉晉都宮閣何必靈芝之臺洛邑山川居然蜜芝之地

中賀

伏惟天皇天臨海內帝有

域中兼漢制而宅兩京用堯心而加百姓神精下降洽至道於丘陵靈液旁霑彼深仁於草木觀其

古今圖書集成
如蓋如閣如日如星得五方之氣象合四時之景色仙人在上則車馬疑飛神龍居下則風雲不去
謂蓬瀛之海列卽崑閬之山開魏皇之雙轅莫儔漢帝之九莖爲劣可以薦郊廟可以觴公卿臣謬
踐儲闈祇膺守國不獲親承左右目覽休徵雖玉莖逆疑齡在神仙而可致而方疑圭入膳視朝夕
而猶賒用是心馳仁壽之前慶集肅成之下無任忻躍之至謹遣官奉表稱賀

皇太子賀天后芝草表

前人

臣某言臣聞德合天地仁之所及也深道貫神明孝之所寘也極故有元功盼靈命氤氲瑤光發
辰象之精金色吐陰陽之秀伏惟天后化含萬物訓正六宮天下彼塗山之音海內仰河洲之教今
月某日使某至伏承芝草生於東都太原守舍利塔屋下芝莖繞殿暫疑王母之臺靈草成田聊比
宓妃之館其蒂紫其莖白露霏雨露之津搖動風雲之氣斜臨網樹分貝葉而重開近對淪池接蓮
花而倒下豈與夫生于石室空傳好道之言產自珠宮徒事不經之說可同年而語哉臣濫承天祚
多慚國本始欽元澗之祥更喜黃雲之地頌聲無輟在郊廟而方傳御膳有憑俯神仙而何遠臣子
之慶倍百恆情無任欣忭之至

爲李北海作進芝草表

蕭穎士

臣某言臣聞郊祀盡敬粢盛豐潔則天降休祉地生靈芝大哉斯元和正氣有感而昭敷者爾古先哲后所由盡心臣本郡道學講堂中梁有芝莢產見六莖共本正向堂門素色純潔流輝棟宇臣遐考曩曆旁窺瑞牒多矣至若神爵九枝青龍三榦菌蠢池鑿歲蕤旬服猶復登諸宗廟被以頌聲又況極道德之至精鑠元元之景命超漢軼魏光圖掩牒之祕瑞伏惟開元天寶聖文神武皇帝陛下大孝尊先元功兆物奐清宮于郡國驅赤縣于仁壽天弗違而寶曆重昌瑞有答而金莖特秀觀其審曲面勢負陰抱陽當九月而生事符陽數挺六莖之表遙叶樂章昭聖祚于天長返皇風于古始加之冰霰奪色緇塵不染迎曉日而相鮮與秋雲而共潔雖復晨敷者五競爽于丹田歲秀者三擢榮于元圃以茲視彼奚其瑣碎臣姓忝宗枝任叨藩首揚吹萬之化預稟陶鈞聳倍百之情寧忘肺腑

爲宰相賀合鍊院產芝草表

孫逖

臣等伏見道士黃河清等奏興慶宮合鍊院內產芝草五色分輝六莖並秀神丹入鍊而轉精願祥

應期以如答觀茲嘉瑞望宣付史官者伏以靈芝所致和氣之精著美仙經標名瑞典陛下深仁契道至德通神鍊液飛丹既啟長年之館敷花育葉遽呈三秀之祥五色有類於卿雲六莖且符於帝樂豈唯動植昭感以表休徵固亦真仙叶應用彰聖壽臣等忝侍軒陛倍深慶悅無任忭躍之至謹奉表陳賀以聞

代百官賀芝草表

獨孤及

臣某等言伏見開府儀同三司魚朝恩奏含輝院及白華亭院內並芝草生者臣等謹按圖牒竊考前典蓋王者以道蒞天下而德及庶物則有靈木神草儲祉效異陛下賢聖恭儉慈仁愛人開闢學校尊教勸德將以五經根本庶政風化所浹神人以和和氣旁達感蒸爲瑞不然豈靈芝菌蠢異處同植不產他宇必於宸居矍矍九葩之蓋煌煌三秀之質蓋表陛下之欽明光宅以人文成化靈根碩茂萬葉無疆神應炳然天意如答臣等獲忝朝列幸觀禎祥無任歡忭之至

禮部賀嘉禾及芝草表

柳宗元

臣某等言伏見今月某日內出劍南所進嘉禾圖及陝州所進紫芝草示百寮者珍圖煥開瑞彩交

映遐邇偕至福應攸同臣某等誠慶誠賀頓首頓首伏惟皇帝陛下緝熙至道保合太和天惟發祥地不愛寶嘉禾擢質靈草抽英獻于王庭唐叔慚同穎之異薦諸郊廟班史謝連葉之奇旣呈薏薏之祥更覩煌煌之秀豐年斯著聖壽用彰飲和之人懽忭無極臣某等優游至化披翫殊姿慶忭之誠倍百恆品

中書門下賀芝草嘉禾表

常袞

臣等言伏見兵部尙書中書門下平章事李抱玉進芝草嘉禾者臣聞王者道洽則靈芝生天下和一則嘉禾應伏惟陛下誕膺景命憂濟生靈合太上之德感元精之氣天地氤氲神明滋液降此珍物叶於昌期垂蓋連莖三華煥發離枝合穎一穗孤秀沐我渥澤扇其祥風衆草之英百穀之長以兆稔歲以待太平昔周得唐郊之獻列篇於典策漢獲甘泉之祉薦歌於清廟三瑞之極一朝會同長發其祥無疆之慶臣等謬忝近侍幸觀休祥喜忭之情倍萬恆品無任歡忭之至

中書門下賀芝草表

前人

臣某言今日中使吳承清至宣示宋汴節度使御史大夫田神功所獻芝草一株紫蓋黃莖叢生者

天生神物王者嘉瑞奇秀之狀靈篇未書伏惟陛下孝通神明德至草木和氣所感禎祥屢彰煌煌靈芝郡國來獻垂以金蓋發其瓊葩爛然紫雲之色灼然紅蘂之秀王德斯應皇家永昌固可寫狀圖牒薦于郊廟祇奉天意贊揚鴻休臣等獲覩殊祥喜倍恆品無任慶忭之至

漢武帝齋宮產靈芝賦

史近

武皇帝慕軒后之風儲思幽通叶珍符於瑞牒產靈芝於齋宮太一清精元君降衷色奪兼金發靈姿以溫潤質逾美玉浮真氣以薰龍原夫帝在華帳儼於仙仗睿思邈以冲寂神心宵其相向髣髴受釐肅其冥貺非煦育之所致乃精神之潛暢挺茲三秀表信三元之符擢此九莖期爾九垓之上異屈軼之致用類朱英之爲狀足表天感與地生或揚臣和而君唱是知至精潛運神物昭彰靈液潛通願生乎枯木貞石神心幽贊故出此闕殿神房冠庶草以爲貴故有時而發祥信稟質以津澤非本媚乎馨香豈比夫楚水之空嘉萍實仙宮之獨貴元霜懿夫道心虛澹我則無味以元感化象貴形我乃無根而效靈是用拔奇瑤砌標異形庭紫蓋與祥雲允合朱莖將火德相冥秀射猗蘭之室光連雲母之屏煥國典而永昭歌頌徹元風而不耀德聲彼丹甌呈豐器車表德潛美巖野挺芳

幽側曷比夫耀甲乙之帳赫矣朱榮結天地之精混然剛克異朝菌之爲體同夜光之非飾含聖澤以成春體正陽而稟色是知人心告虔珍物效焉將會昌於羣帝必功格於上元且神之符則受此靈草神之會則降彼真仙苟獲符而爲約與降質而相懸大寶在乎皇極真居本乎丹田苟溺異以趨怪顧汨聽而表年彼乘蹻而求靜此執迷而徵聖徒有托於齋祈信無裨於性命觀芝宮兮緬爾倏隱翊以奔競庶歸元化之門小彼炎皇之慶

芝草述

宋蔡襄

福州連江縣寧善鄉崇德里保福院產芝一本四月八日癸未令朱定得之詣府質黑而堅葉如側荷其上又出一本離爲六莖枝柯聳密中有連理末如燕尾而朱涅之高可尺許世傳古篆芝字皆枝葉扶疎豈古人象形而作乎而漢齋房歌曰九莖連葉元氣之精正謂元芝而有九莖與葉連也芝之爲物在處有之大較形類苗孺近無是比儻或有焉而予未之見也故特書之

芝閣記

王安石

祥符時封泰山以文天下之平四方以芝來告者萬數其大吏則天子賜書以寵嘉之小吏若民輒

錫金帛方是時希世有力之大臣窮搜而達采山農野老攀緣狙杙以上至不測之高下至澗溪壑谷分崩裂絕幽窮隱伏人迹之所不通往往求焉而芝出於九州四海之間蓋幾於盡矣至今上卽位謙讓不德自大臣不敢言封禪詔有司以祥瑞告者皆勿納於是神奇之產銷藏委翳於蒿藜榛莽之間而山農野老不復知其爲瑞也則知因一時之好惡而能成天下之風俗況於行先王之治哉太丘陳君學文而好奇芝生於庭能識其爲芝惜其可獻而莫售也故閣於其居之東偏掇取而藏之蓋其好奇如此噫芝一也或貴于天子或貴于士或辱于凡民夫豈不以時乎哉士之有道固不役志於貴賤而卒所以貴賤者何以畏哉此予之所以嘆也

與鞠持正尺牘

蘇軾

文登雖稍遠百事可樂島中出一藥名白石芝者香味初若嚼茶久之甚美聞甚益人不可不白公知也白石芝狀如石耳而有香味唯此爲辨祕之祕之

紫芝贊

陳達叟

漆園之菌商山之芝濕生者腴卉生者奇

慶芝堂記

李拱

萬物生于天地之間均一氣也人特秀而靈者故其吉凶禍福善惡妖祥各以類至應疾桴鼓不可誣也上高之西距邑八十里大觀二年六月二十有五日有靈芝生陳氏之圃會之得二三十枝朱莖黃英爛然交錯舒炳煥端如雲霞之態心雖善繪象不能圖也宗族閭里奔走以賀潁川生不敢有上之邑曰縣大夫以仁惠慈愛之政涵養一邦殆其瑞也令聞而辭上之郡曰刺史以忠和愷悌之政風動千里此其應歟太守不自以爲私上之朝廷歌頌天子之德爲太平之佳祥上方躬道德以惇信謙退推讓損抑而不受若曰陰陽至和之氣薰陶生植之自然耶余聞曰吉凶之報豈偶然哉此乃崇寧睿主追述先烈以孝理天下錫之守令承宣風教達之民而不壅陳氏能從上之教化以孝行卓出鄉閭間此芝所以爲國家祥爲郡邑瑞爲陳氏慶一也陳氏名彥輔學爲儒者也少能沈靜有守孝悌嫻睦爲衆所推服父名遠隱醫雖無志於學而慈愛遜禮出于天性能順人之急施貧窮上下百里間以砭劑活死者不可計四方士來者咸食之門下累月不厭真可尙也圃中有堂名慶芝求記其事余固樂道人之善於是乎書

瑞芝亭記

黃庭堅

晉陵邵君叶爲新昌宰視事之三月靈芝五色十二生於便坐之室吏民來觀無不動色相與言曰吾令君殆將有嘉政以福我民乎山川鬼神其與知之矣不然此不薛而秀不根而成非人力所致而自至者何也乃相與闢其室四達爲亭命曰瑞芝奔走來謁記於豫章黃庭堅曰予觀神農草木經青芝生泰山赤芝生衡山黃芝生嵩山白芝生華山黑芝生常山皆久食而輕身延年而不老蓋序列養生之藥不言瑞世之符又其傳五芝曰赤者如珊瑚白者如截肪黑者如澤漆青者如翠羽黃者如紫金皆光明洞徹如堅冰而世之所名芝草不能若是也故嘗考於信書自先秦之世未有稱述芝草者及漢孝武厭飫四海之富貴求致神仙不死天下騷然元封中乃有芝草九莖連葉生甘泉殿齋房中於是赦天下作芝房之歌孝宣興於民間勵精萬事事無過舉然廟享數有美祥頗甘心焉故復修孝武郊祀以瑞紀年元康中金芝九莖又產函德殿銅池中然此芝不生於五嶽果神農經所謂芝者耶余又竊怪漢世旣嘉尙芝草而兩漢循吏之傳未有聞焉何也豈其所居民得其職所去民思其功生則羽儀於朝歿則蒸嘗於社則是民之鳳凰麒麟醴泉芝草也耶抑使民

田畝有禾黍則不必芝草生戶庭使民伏臘有雞豚則不必麟鳳在郊陋黠吏不舞文則不必虎北渡河里胥不追擾則不必蝗不入境此其見效優於空文也耶昔者黃霸引上計吏問興化之條有鵲雀來自京兆舍中飛集丞相府上霸以爲皇天降下神雀欲圖上奏京兆尹張敞言郡國計吏竊笑丞相之仁厚智略有餘而微信奇怪也恐丞相興化之條或長詐僞以敗風俗天子嘉納焉劉昆爲江陵令連年火災昆輒向火叩頭多能反風降雨遷弘農太守驛道多虎崕澗不通昆爲政三年虎負子渡河乃召入爲光祿勳詔問昆江陵反風滅火弘農虎北渡河行何德政而致是對曰偶然耳左右皆笑其質帝歎曰是乃長者之言由君子觀之張敞之篇論世祖之知言建成之文不如光祿之質也雖然新昌之吏民愛其令君將徼福焉焉可誣也又嘗試論之古之傳者曰上世蓋有屈軼指佞蕙蒲扇庖羹莢紀曆嶰竹生律旣不經見後世亦不聞有之則前世之有芝草特未定也邵君家世儒者又能好修求自列於循吏之科故因其氣焰而取之異草來瑞使因是而發政於民勤恤而無倦民得盡力於田士將盡心於學則非常之物而不虛其應且必受賜金增秩之賞用儒術顯於朝廷矣豈獨夸耀下邑而已乎故并書余所論芝草循吏之實使歸刻之

吉州西峯院三秀亭記

前人

廬院比缺守輒以他吏攝承託宿傳舍吏胥視民爲俎豆執鞭者衆羊失其牧歲歲仍饑饉夜有枹鼓不治聲聞京師元豐六年春詔用壽春魏侯魏侯有家法以吏能名一世至則引見官吏問救弊所先下書教民諭以苦語獎拔才能昭勸不勉戒勅宿負聽以功除按行州左右曹三獄累械至三百餘決其得情引歷釋其點染攀牽唯上請須報遠逮證左與繫輕而捕重者乃付有司其所裁遣蓋去三分之二人氣以和下車之十二日芝草二本產於州院獄門之東其後得一本於郡齋便坐之室而最盛於西峯僧舍之秀野亭一月之間凡產芝二十餘磊落權奇人物象成最後寺僧來獻黃芝異本同穎黃者慶色異本同穎者不爭之祥今郡侯樂士愛民天澤優渥五穀順成鈔盜其將衰息健訟之民且化爲慈祥弟友魏侯亦將鴻漸於臺省以受福民之慶則靈芝之生不獨爲吉瑞魏侯因改秀野亭爲三秀屬豫章黃庭堅記之魏侯名綸字君俞其歲之六月甲戌記

俞紫芝字序

秦觀

余昔游玉笥山周行二十四峯訪蕭子雲故隱道見靈芝爲生乎磐石之上回環而有葉秀澤而不

根信天下之異草也竊愛久之留不能去俄有童子朱顏紺髮自松陰中距石輒止撫芝歎曰嘻道人無本其亦如是矣余異而問曰適吾子有緒言不敏未知所謂願終其說童子笑曰子求終乎終之久矣以爲未耶沒身無終雖然嘗試爲汝言其崖略夫德人以有本爲宗道人以無本爲宗天下皆知有物所以失己也不知有己所以失己也而德人知之於是內觀無是外觀無彼無是故能以己爲物無彼故能以物爲己己物不二謂之真一夫是謂以有本爲宗天下皆知有僞所以喪真也不知有真所以喪真也而道人知之於是前際無捨後際無取無捨故不斷一切僞無取故不住一切真真僞兩忘亦無真一夫是之謂以無本爲宗蓋非有本則不能離相而歸空非無本則不能卽空而證實有本然後明心無本然後見性夫子識之人間所謂道德者固不出乎此矣雖然有本無本吾豈能識之哉語未既有老人復杖策自松陰中來顧謂童子曰適何所言童子欲語老人引杖擊之童子走松陰忽然不見還視老人亦已亡矣於是余茫然自失私識其言後九年遊京師遇金華居士俞紫芝請余改字因思昔日玉笥童子之言字曰無本復以其說爲序贈焉

汝陽祖氏先學芝記

前人

大夫祖公無頗自西蜀使者得請以崇福祠官燕居於蔡將還朝謂高郵秦觀曰祖氏本幽州之范陽晉將軍逖實我遠祖其後徙深州至道間始來居蔡今汝陽陽安鄉十里岡之原則我先府君之墓也元豐初有芝數十本產於塋中其後歲歲有之迨今不絕夫豈一氣之運偶然感發莫詰其所以然耶抑天時人事之際或有以致之也子其爲我記之觀曰草之有芝猶鳥之有鳳獸之有麟從古相傳以爲瑞物今乃歲生於先塋之中者殆汝南和氣之應祖氏方大之祥其非偶然決也何以明之汝南在漢爲佳郡陳蕃黃憲二許諸袁之徒實皆郡人俗尙風節輕勢利士不守道則妻妾恥之故天下號汝南爲民氏之區迨唐之世始建彰義節度使屯宿重兵而李希烈吳元濟秦宗權之屬盜有其地王澤不流民氓無知父以弄兵詔子兄以殺人誨弟故天下號淮西爲盜賊之藪皇宋受命定都大梁蔡去京師七驛遂爲輔郡百餘年間良二千石接武而至興學校修貢舉以宣布教化故盛德篤行魁奇俊偉之士相繼出焉蓋唐之舊俗寢微而漢之遺風復起當此之時祖氏一門顯者數人府君之仲弟士衡掌誥掖垣從子無擇通籍內閣大夫踐更中外爲省名郎行且登用諸子森然多有植立其慶末艾也由是言之芝爲汝南和氣之應祖氏方大之祥豈不信然昔新豐市

李興廬子父之墓左有紫芝白芝二本生於墓上柵宗元以爲孝德神化陰中其心克致斯事矧今芝出於股肱之郡侍從之家也宜得一時文學之士比物屬詞歸美於上度爲樂歌薦之郊廟追配元封齋房之簫觀也何足以與此姑承大夫之命論次其事以備作者採擇而已府君諱士龍字德讓元祐八年秦觀少游爲之記

萬歲蟾蜍記

闕名

政和改元歲次辛卯道裕清寧化被動植仁天德日兼覆並照天地之產交通咸和薄海內外恬愉鼓舞山川草木裕如鳥獸魚鼈咸若薰爲太平罄圖郊社創見之瑞日貢於有司非曠古之寶史不書也十一月令朝請大夫集賢堂修撰東西路計度轉運使甘棠張公權判河南知府以經略之才振宣化之任靡冤弗雪靡墮弗修優游暇豫更循民安是時屬邑新安有萬歲蟾蜍背生芝草農夫謝彥得而獻之嘗凌晨汲水於龍澗之津觀此一蟾望日而拱已而立化翊日視之背生芝草長三寸許凡十五葉葉間復異草蒙茸蒼翠歲寒不凋謹接抱朴子萬歲蟾蜍肉芝佩之可以辟兵又按孝經援神契王者德至草木則芝草生今則木肉兩芝合而爲瑞古所未有依類推之蟾目望日照

古今圖書集成
久視也翠草不凋示長生也葉有十五數同蕢焚載之於背事等圖書兩芝相重重熙累洽之祥也
蟾乃望舒之精芝固若木之秀日月合璧之象也此固非分岐合類連理共蒂所能擬也張公以其
瑞獻何公率百官朝賀不其盛歟政和二年四月晦日書庶來年有考焉

跋陳錢芝草圖

陳傳良

頃桂陽廡中柱去礎三四尺所出芝一本婦子不以爲祥掇視余蓋恍然歎芝不遇也明日故枿復
吐三葉紫質黃緣飾見之奇甚但令婦子輩謹視毋掇取逾時色爛然不敗今覩陳君繪芝爲卷有
內相李公宗伯倪公序且頌其所自來不虛得又追歎曩所產芝非特婦子不好事雖予亦不好事
也

書安福劉德禮家紫芝詩卷

周必大

昔安福令歐陽萬五世孫彬實文忠公之曾祖歷仕南京家於安福性至孝兄弟相友愛有紫芝一
莖兩葩生於楹鄉人以爲孝德所感著爲賦頌享年九十四累贈太師中書令後裔仕宦不絕

藏芝賦

有序

王令